



Communicaziun a las medias

Impuls litterars «live» da Schlarigna

Cuir, ils 02-10-2018 – **Seser patgific en ina bella stiva engiadinaisa e tadlar istorgias rumantschas - quai porscha la sisavla lectura da la turnea litterara «Sin il viv!».** La turnea sa ferma là, nua che l'emissiun *Impuls* da Radiotelevision Svizra Rumantscha (RTR) vegn uschiglio tadlada al radio. **Ils 7 d'october 2018 a las 16:00, è quai en la stiva da la Chesa Gianzun a Schlarigna.**

D'aventuras da princessas da pantoflas, d'umans sco giats, d'eroxs dal jet-set u lura dals varsaquants poets ch'èn inspirads dals lais en Engiadin'Ota. Da quai raquantan ils novischems e vegls *Impuls* che Dumenic Andry, Sara Francesca Hermann, Bettina Secchi e Martin Cantieni vegnan a preleger «live» en la stiva da la famiglia da la scriptura Romana Ganzoni en la Chesa Gianzun a Schlarigna.

Questa prelecziun en in rom intim è er ina pussaivladad preziosa da tadlar il renumnà scriptur ladin **Dumenic Andry** ch'è oriund da Ramosch. El scriva *Impuls* gia dapi l'onn 2005 ed ina da sias publicaziuns da prosa curta e lirica è il cudesch *Uondas*. Dal rest ha Dumenic Andry quest onn survegnì il «Premi svizzer da litteratura» per ses tom da lirica *Sablun*. Plinavant vegn la Samedrina **Sara Francesca Hermann** a preleger en stiva a Schlarigna. Ella è actura, fa part da la cumpagnia da teater «Mummenschanz» e scriva dapi l'onn 2016 *Impuls*.

Era il segund um dal quartet empermettent – il Sursilvan **Martin Cantieni** – scriva dapi il 2016 per l'emissiun *Impuls*. Uschiglio studegia Martin Cantieni filosofia - la quala è era savens in tema en ses texts litterars. La quarta autura dal quartet che prelegia ses *Impuls* en stiva a Schlarigna è **Bettina Secchi**. Ella è oriunda da Zuoz, viva e lavura però dapi l'onn 1996 a Locarno. Per l'emissiun *Impuls* scriva ella dapi l'onn 2004 e quai cun magari in tic italianità.

La setavla ed ultima lectura da «Sin il viv!» ha lieu dumengia, ils 4 da november 2018 a las 10:30, durant ils «Dis da Litteratura» en il salun da coiffeur «Haaratelier» a Domat. Là legian Carlo Beer, Plinio Meyer, Myriam Pelican e Jessica Zuan *Impuls* che raquantan da las rimas tranter las lingias, dal scriver per il survivor, da la frisura da chignon u da glied cun pail sin ils dents. La turnea che vegn moderada da Flurina Badel è publica, l'entrada libra.

Dapli infurmaziuns

RTR | Tamara Deflorin | scheffa communicaziun | tel. 081 255 75 09 | tamara.deflorin@rtr.ch